

19. oktober 2020

**Nunatsinni inulerinermi; isumaginninnikkut, perorsaanikkut, peqqissaanikkut, tarnillu pissusaaanik ilisimasaqarnikkut atorfissaqartinneqartut ataatsimoortumik pilersaarusiornikkut pisariaqartitatta qanoq anguneqarnissaanerat pillugu apeqquteqaat aallaavigalugu oqallisissiaq.**

(Inatsisartunut ilaasortaq Peter Olsen, Inuit Ataqaigiit)

Siullermik Siumumiik qutsavigerusupparput apeqquteqaat aallaavigalugu Inatsisartuni oqallinnissamik siunnersuuteqartoq Peter Olsen Inuit Ataqaigiit.

Oqallisissiamik qaqitaqartup saqqummiussai isumaqatigaagut ilaatigut oqarmat, "assaat kissartut" pisariaqartittorujussuugigut, taamaattumillu annertusisamik tamatumap aaqqiiviginissaa sulissutigisariaqaripput.

Siumumiik tunuarsimaarsimangilagut oqaatigissallugu, ajornartorsiutip aaqqiiviginissaanut akisussaaffimmik tiguseqataarusunnerput.

Aasap ingerlanerani Siumuuk kattuffiup aallartitai ataatsimeeqatigisimavagut aammalu kingorna inatsisartut aallartilernerani gruppe-tinni naapissimallutigut. Ullorlu 25. September Nunatsinni perorsaat kattuffiata aaqqissuussaanik illoqarfippaalunni akerliussutsimik takutitsineranni, oqariartuutaa assut tigulluarsimavagut, maannalu aningaasanut inatsimmi annertusisamik aningaasaliiffiginissaannut Siumumiik kissaateqarsimalluta. Isumaqatiginninniarnerrillu suli ingerlammata, tamatumap inaarsariartornerani malinnaavigeqqissaarumaarparput. Siumumiillu pissanngatigiinnassavarput partiit allat, aningaasanut inatsimmut atatillugu isumaqatigiinninniarnermi pitsanngorsaanissanut akuerseqataassanersut.

Akissaatitigummi aaqqiisoqanngippat aammalu sulinermi atukkat pitsanngorsarneqanngippata inulerisut siunissami suli ullumikkorniit annerusumik amigaatigineqalernissaat ernumassutigisorujussuugatsigu.

Oqallisissiaqartup qaqitaasa ilagaat ilinniartitaanikkut aaqqissuussaalluartumik iliuseqarnissaaq. Tamannalu Siumumiik isumaqatigaarput. Siumumiillu nuannaarutigisaqaarput aamalu tulluusimaarutigalutigu ullumikkut Perorsaanermik Ilinniarfik SPS Ilulissaniittoq pitsaasumik qaffasissumillu ilinniarnissamut ingerlatsisarmata. Tamatumallu saniatigut aamma najugaq qimannagu perorsaatut ilinniarsinnaaneq illoqarfiit ilaanni ingerlanneqartartoq pitsaasutut isumaqarfigaarput. Tamannalu suli inerisaqqinneqarsinnaanissaa Perorsaanermik Ilinniarfik SPS minnerunngitsum, illu Kommuunit aammalu perorsaat kattuffiat suleqatigalugit ineriartorteqqinneqartariaqartoq Siumumiik isumaqarpugut. Taamaasiornikkut nunatsinni

perorsaasut amerlanerusut ilinniarnissaat aammalu ullumikkut perorsaasutut, assistent-itullu atorfeqartut, qaffassarsinnaanissaat suliasat pingaarutillit ilagimmassuk.

Meeraratatta toqqissimasumik pitsaasumillu ineriartortinneqarnissaanii inulerisut pitsaasumik atugasaqartinneqarnerisigut qulakkeerinnittussaavugut. Meeqqerisuinnaanngillat taamak atugaqartinneqartut, aammali soorlu oqallisissiaqartup eqqaasai, tassalu utoqqaat illuani, ulloq unnuarlu angerlarsimaffinni aammalu innarluutilinnik sullissisut assorujussuaq sulisussaaleqisarput.

Qineqqusaarnermi partiit tamatta isumaqatigiissutiginiuuvarput meeqqerisut perorsaasullu akissarsiaasa aqqiviginissaannut suleqataarusulluta. Taamaattumik Inatsisartoqatikka maaniittut akisussaassusilimmik tiguseqataanissamut suleqataanissaannut Siumumiik suleqatiseraatsigit. Tassami aningaasanut inatsisissaq suliarineleruttorpoq, tassanilu meeqqerisut perorsaasullu akissataasa timitalimmik aqqiviginissaannut suleqatiseraassi. Perorsaasut meeqqerisullu atugaat partiilersuunnagut qineqqusaarutiginnarnagulu suleqatigiilluta akisussaassusilimmik aqqiivigitigu.

Naggataatigut siumumiik oqaatigissavarput “assaak kissartut” meeqqerisut perorsaasullu nunarput tamakkerlugu sulisorpassuit pinngitsoorsinnaanngisagut annertuumik qujassutissaqarfigerusukkatsigit.

Taama oqaaseqarluta Siumumiit apeqquteqaat aallaavigalugu oqallisissiamik qaqitaqartoq qutsavigaarput.

Erik Jensen - Siumut